

Թոնքի անշեղ և միշտ կրկնվող հաջորդականությունների վրա: Բուսական աշխարհի նորոգվելն ու նոր սերունդի բեղմնավորվելը շաղկապվում էր մարդկային ցեղի արական և իգական սեռերի մերձավորման հետ և գարնանը բուսական կյանքի նորոգվող ուժը նույնացվում էր մարդկային սերունդի նորոգվող ուժի հետ: Հասկանալի է, թե ինչու նաև բուսական կյանքի նորոգվելը բացատրվում էր արական և իգական սկիզբների փոխաձգումով և մերձենալով: Ատտիսին կից պաշտվում էր Փոքր Ասիայում՝ Փոյուզիայում՝ Կիբելան, Քամուկին կից՝ Իշտարը, Ադոնիսին կից՝ Բաալատ (Բէլիտ)², Աշտորէտ: Կիբելան ուներ ահագին թվով պաշտոններ և՛ փոքրասիական ժողովուրդների մեջ, և՛ Հունաստանում, և՛ Հռոմում որպես «Մեծ մայր», Magna Mater, հունական Միդրո կամ ամեն տեղ պարզապես՝ Մա-Ման-սերունդներ առաջ բերող մայր³: Այս աստվածուհու պատկերումը բոլորովին համընկնում է հայկական Անահիտի պատկերման հետ, որ է՝ «մեծ Անահիտ տիկին...: է փառք ազգիս մերոյ և կեցուցիչ ... որ է մայր ամենայն զգաստութեանց, բարերար ամեն մարդկան բնութեան, ծնունդ է Մեծին արին Արամազդայ»... «Մեծ Անահիտ, որով կեայ և զկենդանութիւն կրէ երկիրս հայոց»⁴: Ըստ հայկական առասպելաբանության Անահիտին վերագրվող հատկանիշները բացատրվում են ոչ թե զրադաշտական, այլ փոքրասիական կրոնական հայացքների զուգորդությամբ:

Մի այլ մանրամասնություն հեռացնում է մեզ Իրանից և տեղափոխում կրկին Փոքր Ասիայի կուլտուրական աշխարհը: Կիբելայի սիրելին կրում էր Փոյուզիայում Ատտիս անունը, այլ դեպքերում՝ Սաբաձիու⁵ կամ Մէն: Ըստ Նիկ. Մառի, Սաբաձիու անունը հայկական հողի վրա ստացել է «աստված» ձևը⁶: Հետաքրքրական է, որ հրե Հայաստանում քրիստոնեությունը դարձավ ընդհանուրից ճանաչված կրոն, միաստվածության համար գործազրկեց Աստված անունը և ոչ թե Դի⁷: Վերջինը թվում է, թե գլխավորապես իշխող դասի մեջ գործածվող անուն էր՝ թագավորական տան, նախարարների և քուրմերի մոտ, իսկ լայն զանգվածների մեջ ավելի տարածված է եղել Աստված-Ատտիս-Սաբաձիու անունը: Այդ պատճառով էլ վերջին բառը նախընտրվել է քրիստոնեական միաստվածությունն արտահայտելու համար:

Կարելի է մի երրորդ համեմատական նյութ մատնանշել, որը ավելի դյուրին հասկանալի է դառնում ոչ թե հարևան արևելյան, զրադաշտական, այլ արևմտական՝ փոքրասիականի հետ համադրելով: Վանագնի պաշտամունքը, որը սերտորեն զուգորդվում էր Անահիտի պաշտամունքի հետ և հեթանոս հայի աչքում նրա կողքին առաջնակարգ տեղ էր զրավում աշխարհի բախտը կարգավորվելու մեջ, կրում է նաև Վիշապաֆաղ անունը: Հայտնի է, որ Սաբա-

² Արական աստվածության հետ կապվում է իգականը: Սիրոնում՝ Բաալ և Աստարտե, Հիեբոպոլսում՝ Ադադ և Ատերգատիս, Ասորեստանում՝ Բէլ և Մէլիտտա:

³ La Grande Encyclopédie, XXVI, 804—Cybèle—la force productrice et féconde, la mère de toute chose, la déesse de la génération.

⁴ Ագաթանգեղոս, գլ. Ե, § 53, 68:

⁵ Կան կարծիքներ, որ Սաբաձիու-Ատտիսի մակերես էր՝ Pauly-Wissowa, Réal Encyclopédie*.

⁶ Март Н. Я., Бог Сабадзиос у армян, ИАН, 1911, էջ 759—774, Его же, Фрако-армянский Σαβάζιος—aswai и сванское божество охоты, ИАН. 1912, էջ 827:

⁷ Հույների մեջ՝ Ζεύς-Δίος, հռոմայեցիների մեջ՝ Deus, գերմանացիների մեջ՝ Gott, սլավոնների մեջ՝ Бог.

* Σαβάζιος, Թրակո-փոյուզիական աստված, որը հետզհետե նմանեցվեց հունակ. Διόυσιος-ի Դիոնիսոսի հետ (Ժան. Խմբ.):